



## **FORUM ONG TIMOR LESTE THE EAST TIMOR NGO FORUM**

Dili, 03 Feveireiru 2012

Hato`o ba :

Exelentisimu, **Dra. Lucia Maria Brandão Lobato**

**Ministra da Justisa RDTL**

Iha \_

**Fatin**

**Asuntu : Preukupasaun Sosiadade Civil ba Rekomendasaun UPR Ne`ebe Estadu  
Timor-Leste Sidauk Aseita Liu-liu ba Asuntu Justisa Transisaun**

**Anexo : Rekomendasaun UPR 36 Ne`ebe Estadu Sidauk Aseita.**

Ho respeito,

Ami husi ONG sira ne`ebè kompostu husi JSMP, La`o Hamutuk, STP-CAVR, Komisaun Justisa no Paz Diocese Dili, Asosiasaun Vitima 1974-1999 no TROCAIRE, ba dala uluk hakarak kongratula ba Governu Timor-Leste tanba kumpri ninia obrigasaun hodi hato`o tiha ona relatõriu universal revijaun periodiku kona ba situasaun geral Direitus Umanus iha Timor-Leste periodu 2005-2010. Tuir ami nian perspetiva, ida ne`e nudár prosesu inisiu ne`ebè importante tebes ba Timor-Leste iha futuru atu fortifika liu tan estadu nian komitmentu ba comunidade internasionál kona-ba kestaun sira direitus umanus iha ita nian rai Timor-Leste.

Iha parte seluk, relasiona ho rekomendasaun UPR 125 ne`ebè hato`o ona husi membrus Konseillu Direitus Umanus ONU nian ba Estadu Timor-Leste durante sesaun plenária iha Geneva. Estadu Timor-Leste desidi hodi simu rekomendasaun hamutuk 46 no rekomendasaun hamutuk 36 mak estadu sidauk aseita. Refere ba rekomendasaun 36 ne`ebè Estadu Timor-Leste seidaun aseita ka sei iha prosesu analiza nia laran, maka liu husi oportunidade ida ne`e ami Sosiadade Sivil ne`ebè servisu foku ba asuntu justisa transisaun hakarak hato`o ami nian preukupasaun nomos sugestaun ne`ebè ami hanoin importante tebes atu hetan konsiderasaun husi Estadu Timor-Leste.

Tuir ami nian perspetiva hanoin katak asuntu justisa pasadu sai nudár fatores ne`ebè importante tebes atu garanti Seguransa, Povu nia vida no prosesu hametin sistema justisa iha futuru. Tanba ne`e, medidas hotu ne`ebe atu garanti prosesu akuntabilidade ba krime sira iha pasadu, estadu labele konsideira nudár prosesu ida ketak husi prosesu atu hametin sistema justisa no akontabilidade iha tempu agora no iha tempu oin-mai. Ita nian esperiensa durante ne`e hatudu ona mai ita katak bainhira ita la fo importansia atu hakotu korenti impunidade ba hahalok a`at sira ne`ebè akontese iha pasadu, ami fiar katak hahalok a`at hirak ne`e sei akontese ba nafatin iha futuru. Ezemplu kazu krize 2006 no tipu kazu violasaun Direitus Umanus sira seluk ne`ebè akontese depois Timor-Leste Ukun Rasik A`an, sai hanesan indikador ida hodi sukat katak

korente impunidade sei nafatin forte iha Timor-Leste ne`ebè fo impaktu boot ba Siguransa, Povu nia moris no prosesu hametin sistema justisa iha futuru.

Tanba ne`e, ami sugere ba Sua Exelensia Ministra da Justisa nudár xefe delegasaun Governu ba relatòriu UPR Timor-Leste, atu konsideira no simu rekomendasaun hirak ne`ebè relasiona ho justisa transisaun mak seidauk hetan konkordasia husi Governu Timor-Leste mak hanesan tuir mai ne`e;

1. Atu asina no ratifika Konvensaun Internasionál ba ema lakon obrigatorio/halakon forsadu
2. Atu fo prioridade hodi implementa rekomendasaun CAVR & CVA nian, inklui adopta lejislasaun kona ba lei reparasaun no institutu memòria ne`ebè sei pendentis hela iha Parlamentu Nasionál no establese programa reparasaun ba vitima sira entre tinan 1974-1999.
3. Atu garante efikas hodi hare tuir ba implementasaun husi rekomendasaun sira hotu husi CAVR & CVA.
4. Atu regula prosesu Indultu husi Presidente no atu hasa`e transparansia iha prosesu ne`e, persiza rona komentáriu husi vitima sira nomos prokuradòr sira relasiona ho asunto ne`e.
5. Atu labele fo imajen ne`ebè ladun diak ba comunidade inter internasionál relasiona ho staitmentu formál husi Governu Timor-Leste ne`ebè deklarata katak Governu implementa ona rekomendasaun husi CAVR & CVA hamutuk mais-menus atus ida resin, hanesan sidadaun ami sugere atu halo desiminasan informasaun ne`ebè detaillu kona ba rekomendasun CAVR & CVA ne`ebè governu implementa ona. Nune`e staitmentu ne`e laos justifikaun no ami hanesan sidadaun la hela ho duvidas.

Ami mos husu ba Governu Timor-Leste, liu husi Ministeriu Justisa nudár responsavel hato`o relatòriu iha iha Konsellu Direitus Umanus, atu hamutuk ho Sosiadade Civil hodi husu ba Nasòens Unidas no Governu sira seluk ne`ebè kontribui ba okupasaun Indonesia nia iha Timor-Leste, atu mos hala`o sira nia responsabilidade tuir rekomendasaun husi CAVR & CVA.

Mak ne`e deit ami nia pedidu ba Sua Exellensia no hein katak bele hetan konsiderasaun no atensaun diak husi ita bo`ot.

Ami Nia Respeitu :

1. Rogerio Viegas Vicente/Direitor Asosiasaun HAK (.....)
2. Luis de Oliveira Sampaio/Direitor JSMP (.....)
3. Manuela Pereira Leong/Koordenador ICTJ Timor-Leste (.....)
4. Luzinho Martins/Comisaun Justisa no Paz (.....)
5. Cris Caetano/Program Officer Trocaire (.....)
6. Celestinho Gusmão Pereira/Lao Hamutuk (.....)
7. Reverendu Agostinho Vas Conselho/STP-CAVR (.....)
8. Jose Luis de Oliveira/Asosiasaun Vitima (.....)